

այդտեղ դուրս կը դայ 35-40 հազար: Այնուհետեւ, Նախիջեւանի երկրամասի ընդհանուր՝ 20,000 բնակչութեան $\frac{2}{3}$ -ը եղել է թաթար: Եթէ մնացած $\frac{1}{3}$ -ն էլ հայ տարր համարենք, ուրեմն վերջինիս թիւը եղած կը լինի՝ 6,700:

Ղարաբաղի համար Բողենշտէզտ տալիս է 60,000 թիւը, որի, ասում է որոշակի, $\frac{1}{3}$ -ը, — ուրեմն 20,000 — հայեր են եղած:

Ախալցխայի փաշայութեան բնակչութեան թիւը Բ. 50,000 է համարում մօտաւորապէս, որի «մեծամասնութիւնը» հայ, ասել է ուրեմն՝ մօտ 30,000:

Փամբակ-Շորապետի, Ղազար-Շամշատի եւ Գանձակի գաւառի մասին թուական տուեալներ չունի Բողենշտէզտ, միայն Շուշի (6000) եւ Գանձակ (8000, որի $\frac{1}{3}$ -ը՝ հայ) քաղաքների բնակչութեան թուի մասին կան տեղեկութիւններ:

Վերջիններս պակսում են նաեւ Թիֆլիսի ու առհասարակ Վրաստանի, ինչպէս նաեւ Արեւելեան Անդրկովկասի զանազան գաւառներում ցրուած հայութեան ամբողջական թուի մասին:

Երեւանի, Նախիջեւանի, Ղարաբաղի եւ Ախալցխայի փաշայութեան հայերին վերաբերեալ բացորոշ կըր թիւերը եթէ գումարելու լինինք իրար հետ (40,000+7,000+20,000+30,000), կը ստանանք 97,000: Թէեւ Բողենշտէզտ ամէն անգամ որոշակի չէ ասում, բայց պարզ է, որ նրա յառաջ բերած թիւերը վերաբերում են բնակչութեան արական սեռին, ինչպէս որ սովորութիւն է եղել այն ժամանակ վիճակագրել: Եւ յետոյ, ինչպէս ընթերցողը տեսաւ, Բողենշտէզտ վերը՝ Կովկասին վերաբերող ընդհանուր թիւը ($1\frac{1}{2}$ միլ.) յիշելիս շատ որոշ ասում է ինքը, թէ դա վերաբերում է միայն արական սեռին:

Տեսանք արդէն, որ Բողենշտէզտ, Անդրրկովկասի հայ արական սեռի բնակչութեան թիւը հաշուում է 135,000: Եթէ այս թուից հանելու լինինք մեր ստացած վերոյիշեալ թիւը՝ 97,000, կը մնայ 38,000: Նշանակում է՝ այսչափ հայ բնակչութիւն էլ ընկնում է Փամբակ-Շորապետի, Ղազար-Շամշատի եւ Գանձակ վարչական միւսւորների եւ առհասարակ մնացեալ Կովկասի վրայ: Որով, ըստ Բողենշտէզտի, «Հայկական Շրջանի» ընդհանուր

բնակչութեան թիւը եղել է մօտաւորապէս՝ 180-200,000 (միայն արական՝ 90-100,000), եթէ արական բնակիչների թուին հաւասար ընդունենք իգականների թիւը: (Հախտաւոր՝ զէմ տալիս է 164,500 թիւը):

Հայեր եղել են Հայկ. Շրջանում, նայելով Բ. ի տուեալներին, ընդամենը ուրեմն 80-92,000, (ըստ Հաքստհաուզէնի՝ 110,000):

Ամբողջ Կովկասի — աւելի ճիշդը՝ Անդրրկովկասի — հայերի ընդհանուր թիւը Բողենշտէզտ ընդունում է ուրեմն 270,000 (135,000 արական, 135,000 իգական սեռի): Այս թիւն էլ մօտ է Հաքստհաուզէնի տուեալներից բխող հաշուին (ըստ Քէօպէնի 294,000):

Նկատի ունենալով որ Բողենշտէզտ ինքն էլ ընդունում է, որ Կովկասին յատկացրած (ուրեմն եւ Անդրկովկասին) թիւը սեղմ է հաշուած, որով նոյնը պիտի ընդունել նաեւ առանձին-առանձին ցեղերի թուի մասին, ապա ուրեմն ճշմարտութեան մօտ կը լինինք եթէ ասենք, որ Բողենշտէզտի տուեալներով հայութեան ընդհանուր թիւը 1840-ական թուականների սկզբին հաշուելու է մօտ երեք հարիւր հազար, որից մօտ 100,000-ը՝ «Հայկական Շրջանում» կամ «Ռուսահայաստան» դիտուած երկրամասում: Վերջին եւ մանաւանդ առաջին թիւն էլ իրենց կողմից գրեթէ նոյնանում են Հաքստհաուզէնի տուեալներին (տես «Հայրենիք» ամսագիր, 1926, դեկտ. դերքը): Իսկ առհասարակ Ռուսաստանում ապրող բոլոր հայերի թիւը, տեսանք, Բողենշտէզտ հաշուում է 400,000:

Հետաքրքրական պիտի լինէր բաղդատել Բողենշտէզտի եւ Հաքստհաուզէնի թուական տուեալները վրացական եւ բուրք-քաքարական ցեղերի մասին եւս, որ սակայն մեզ շատ հեռու պիտի տանէր: Այսչափը ասենք, որ այդ մասին յիշեալ երկու աղբիւրները զգալիօրէն տարբերում են իրարից, մանաւանդ վրացիների վերաբերմամբ, ուստի եւ կարօտ են քննական լուսարանութեան:

* * *

Այժմ տեսնենք, թէ Բողենշտէզտ ի՞նչ տեղեկութիւններ է տալիս հայ երկրի եւ ժողովրդի մասին:

Բողենշտէզտ Հայաստան է գնացել, Թիֆլիսից, 1844 թուականի մարտի վերջերին,